

I

Tiaind qu' i aivôs ché ans i aî vu, ïn cô, ènne magnifyitche imaidge, dains ïn yivre tchu lo Bôs Vierdge que s' aipplait « Hichtoires vétieues ». Çoli r'préjentaît ïn sèrpent boa qu' aivâlait ïn fâve (*fauve*). Voili lai r'dyene (*copie*) di graiy'naidge (*dessin*) ...

An diait dains l' yivre : « Les sèrpents boas aivâlant yôte prô tote entiere, sains lai maîtcheyie (*mâcher*). Encheûte ès n' poéyant pus boudgi èt ès dreumant ché mois de temps de yôte didgèchion. »

Aidonc i aî brâment musè tchu les aiveintures de lai djungle èt, en mon toué, i aî grôtè (*réussi*), aivô ïn graiyon de tieûlèe, è traicie mon premie graiy'naidge. Mon graiy'naidge nïnmrô 1. Èl était dïnche...

Î aî montrè mon tchèfe-d'oeûvre és grantes dgens èt i yos aî dmaindè che mon graiy'naidge yos fsaît è pavou.

Èlles m' aint réponju : « Poquoi qu' ïn tchaipé fraît è pavou ? »

Mon graiy'naidge ne r'préjentaît pe ïn tchaipé. È r'préjentaît ïn sèrpent boa que didgèrait ïn éyéfant. Aidonc i aî graiyonè lo d'dains di sèrpent boa, aïfïn que les grantes dgens poéyeuchïnt compâre. Èlles aint aidé fâte d' échpyicâchions. Mon graiy'naidge nïnmrô 2 était dïnche...

Les grantes dgens m' aint consèyie de léchie d' ènne san les graiy'naidges de sèrpents boas eûvies ou bïn freumès, èt de m' intèrèchie putôt en lai dgéograiphie, en l' hichtoire, â calcul èt en lai grammère. Ç' ât dïnche qu' i aî aibaind'nè, en l' aïdge de ché ans, ïn magnifyitche métie de môlaire (*peintre*). Î étôs aivu décoraidgie poi l' ïnvait-bïn (*insuccès*) d' mon graiy'naidge nïnmrô 1 èt d' mon graiy'naidge nïnmrô 2. Les grantes dgens ne compreniant djmais ran tot d' poi yos (*toutes seules*), èt ç' ât sôlaint, po les afaints, d' aidé èt aidé yos bèyie des échpyicâchions.

Î aî dïnche daivu tchoisi ïn âtre métie èt i aî aïppris è piyotaie des oûjés d' fie (*avions*). Î aî voulè ïn pô poitchot dains l' monde. Èt lai dgéograiphie, ç' ât éjâct, m' é brâment sèrvi. Î saivôs rcoégnâtre di premie cô d' eûye, lai Chine de l' Arizona. Ç' ât brâment utiye, che l' an ât ébieûgi (*égaré*) di temps d' lai neût.

Î aî dïnche aivu, di temps d' mai vie, des moncés (*quantités*) de r'laichions (*contacts*) aivô des moncés de dgens sérieuses. Î aî brâment vétie tchéz les grantes dgens. Î les aî vues de tot prés. Çoli n' é pe trop faît è vni moiyou (*amélioré*) mon aivis.

Tiaind qu' i en reincontrôs yènne que me sannait ïn pô yucide, i fsôs l' échpérieinche tchu lée de mon graiy'naidge nïnmrô 1 qu' i aî aidé voidjè. Î vlôs saivoi ch' èlle était vrâment comprenchive. Mains aidé èlle me réponjait : « Ç' ât ïn tchaipé. » Aidonc i n' yi djâsôs ne de sèrpents boas, ne de bôs vierdges, ne de yeûtchïns. Î m' botôs en sai poétchèe. Î yi djâsôs de breudge (*bridge*), de gouffe (*golf*), de polititche èt de graivates. Èt lai grante dgen était aïje (*contente*) de coégnâtre ïn hanne âchi réjnâle (*raisonnable*).